



Na osnovu člana 17. stav (2) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanović - Butigan, potpredsjednice Vijeća, te tužiteljica Bojana Jolović, tužiteljica Snježana Petković, advokatica mr. Duška Bogojević, sudija Mustafa Šabić, tužilac Saša Sarajlić, tužilac Sanin Bogunić, sutkinja Ljiljana Bošnjak Glizijan, prof. dr. Džamna Vranić, advokat dr. sc Davor Martinović, tužiteljica Željka Fabić, advokatica Elma Veledar Arifagić i sudija Velimir Ninković, na sjednici održanoj 05. i 07.02.2025. godine, donijelo je

R J E Š E N J E

o imenovanju glavnog tužioca Okružnog javnog tužilaštva u Trebinju

- I. Za glavnog tužioca Okružnog javnog tužilaštva u Trebinju imenuje se **Pojužina Milimir** na mandat od pet (5) godina.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija glavnog tužioca Okružnog javnog tužilaštva u Trebinju.

Nakon provedene konkursne procedure, nadležno podvijeće je u skladu sa članom 61b. stav. (1) Poslovnika VSTV-a BiH za glavnog tužioca navedenog tužilaštva predložilo kandidate na rang listi pod rednim brojem 1 i 2 sa liste uspješnih kandidata, i to Pojužina Milimira i Šalvarica Gordanu, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazložene prijedloge za oba navedena kandidata sa rang liste pod rednim br. 1 i 2, sa bodovima koje su kandidati ostvarili u konkursnoj proceduri i njihovim programom rada, te rang listu kandidata.

Nakon izlaganja prijedloga podvijeća, oba predložena kandidata su na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložili svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. st. (8), (9) i (10) Poslovnika VSTV-a BiH, odlučilo da za glavnog tužioca Okružnog javnog

tužilaštva u Trebinju imenuje kandidata na rang listi pod rednim brojem 1 Pojužina Milimira, koji od 01.04.2020. godine obavlja dužnost tužioca u Okružnom javnom tužilaštvu u Trebinju.

Prethodno imenovanju na poziciju tužioca navedenog tužilaštva, imenovani kandidat je u periodu od 2016. g. do 2020. g obavljao poslove disciplinskog sudije i predsjednika prvostepene disciplinske komisije pri Ministarstvu unutrašnjih poslova Republike Srpske, a u periodu od 2012. g. do 2016. g. obavljao je poslove inspektora pri Ministarstvu unutrašnjih poslova Republike Srpske, Policijska stanica Trebinje.

Vijeće je nakon ocjene stručnosti kandidata, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidata, profesionalnu nepristranost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 27 bodova od mogućih 30 bodova, što ga je u konačnici rangiralo na prvom mjestu rang liste kandidata sa ukupno ostvarenih 127 bodova od mogućih 130 bodova.

Kriteriji stručnosti i sposobnosti pravne analize imenovanog kandidata, koji već obavlja dužnost tužioca, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijava po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je kandidat za navedene tri godine za koje je ocijenjen ostvario prosjek od 5. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti i rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 27 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (2) tačka a) Poslovnika VSTV-a BiH stekao uvjete za predlaganje i imenovanje na poziciju glavnog tužioca okružnog javnog tužilaštva, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Imenovanje navedenog kandidata, pored uspjeha postignutog u konkursnoj proceduri, opredjelio je i sveobuhvatan program rada Okružnog javnog tužilaštva u Trebinju za mandatni period koji je kandidat dostavio u toku konkursne procedure i izložio tokom obavljenog razgovora pred nadležnom komisijom Vijeća, kao i na sjednici Vijeća. Detaljno i uvjerljivo je obrazložio strateške ciljeve i cilijane rezultate, te je

predložio mjere za unapređenje efikasnosti i kvalitete rada tužilaštva. Osim toga, detaljno je izložio moguće rizike koji bi mogli doprinijeti neostvarenju strateških ciljeva, kao i način rukovođenja navedenim tužilaštvom.

Kroz izlaganje programa rada imenovani kandidat je iskazao visoke rukovodne i organizacione vještine i sposobnosti upravljanja ljudskim potencijalima, koje ga prema ocjeni Vijeća preporučuju za poziciju glavnog tužioca.

Dakle, Vijeće smatra da će imenovani kandidat uspješno odgovoriti svim zadacima i izazovima koji se postavljaju pred ovako značajnu rukovodnu poziciju. Osnov za takvu tvrdnju, osim prethodno navedenog, temelji se i na stručnim i ličnim kapacitetima i integritetu, odnosno dugogodišnjem iskustvu kandidata iz oblasti borbe protiv kriminala, od čega pet godina u pravosuđu, obavljajući poslove okružnog javnog tužioca i iskazanoj predanosti u radu, a ostatak u Ministarstvu unutrašnjih poslova Republike Srpske.

Uzimajući u obzir navedeno, Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju glavnog tužioca Okružnog javnog tužilaštva u Trebinju.

Kandidat se na dužnost glavnog tužioca, u skladu sa članom 31. stav (2) Zakona o VSTV-u BiH imenuje na mandat od 5 (pet) godina.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju imenovanog kandidata, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-722-1/2025
Datum: 05.02.2025. godine



